

Bubinan ta hopi vulnerabel pa disturbio

ORANJESTAD - Desde aña 1984 despues cu Departamento di Agricultura, Cria y Pesca (DLVV), conoci popularmente como Santa Rosa, a cuminsa asisti den e observacion di e Bubinan rond di nos isla e interes y conocimiento pa cu e conservacion y comportacion di e parhanan aki a bin ta crece.

Atencion pa e Bubinan
Na aña 2000 te cu aña 2011 DLVV tabata envolvi den e Aruba Tern Project por medio di ing. Facundo Franken, unda cu a haci estudio riba e colonia di Bubi na e waf di Oranjestad.

A wordo poni palapanan na Malmok, borchinan riba rif di San Nicolas, a haci peticion pa haya rapportnan di Aruba Tern Project y a continua cu vigilancia riba e rifnan.

Durante e añanan tambe DLVV a elabora reportanenan pa noticia y television y a organisa un presentacion pa AHATA environmental committee na aña 2003.

Tambe tabatin un reunion cu refineria Valero Aruba cu e Aruba Tern Project na 2005, caminda a elabora un aviso informativo pa informa usuarionan di lama di colony di Bubinan. A wordo sugeri pa mas hende participa den e clean up di e rifnan cu Valero



Volunteers pa cu aña 2006, 2008, y 2010.

Despues di e Aruba Tern Project, DLVV a sigui conta neish, puyito y webo di e Bubinan. Den juni 2012 y 2013 DLVV tabata topa cu puyitonan di e Meuchi Bacho Preto cu ya tabata bula y puyitonan di Bubi Chikito na e momentonan ey, apenas tabata tin dos siman bieu.

Dato di ATP

Segun e mesun dato di ATP e Roseate Tern, Meuchi, ya no ta broei mas riba e rifnan di San Nicolas. Desde aña 1892 caba e sorto aki ta conoci cu e ta pone na Aruba. Sinembargo ora cu e maneho di e refineria a cambia nan a stop di pone riba un di e piernan. Apesar di esaki DLVV a yega di mira nan pone riba baranca pariba di Bachelor's Beach.

Na 2005 DLVV a mira puyitonan morto riba e rif dilanti Savaneta despues di Siman Santo. Probablemente e mayornan a bandona nan debi na presencia di hende. Bubinan ta hopi vulnerabel pa disturbio durante formamento di pareha, inicio di pone webo y broei y webonan.

Te asina cu hopi webo por bay perdi of e mayornan ta bandona nan cria. Acerca ta bin cu nan ta parhanan cu ta pone solamente un periodo. Si nan tin cu bolbe pone e posibilidad ta grandi cu e cria no ta fuerte suficiente den Augustus pa bula cu e mayornan bay bek pa lama di Brasil, unda cu nan ta biba e resto di aña.

Habitat

Na 2008 Birdlife International a categorisa e rifnan di San Nicolas y Oranjestad como areanan importante pa parha (Important Bird Area). Di e Meuchi Bachi Preto, un porcentahe mundial significativo ta broei na San Nicolas.

Entre e otro 10 sortonan di Bubi tin e Bridled y e Common Terns, di cuanan poblacion regional di importancia ta broei na San Nicolas y e Black Noddy di cua e rifnan lo ta un di e dos luganan di henter Caribe cu nan ta frecuencia.

Na 2011 Birds Caribbean a categorisa e rifnan di San Nicolas, na di dos lugan di e areanan importante di colonia di Bubi cu a resta den Caribe. Sinembargo sin proteccion legal pa e sorto y of pa e areanan esakinan lo keda perde tereno na Aruba.

Charla

Ing. Facundo Franken di DLVV, a gana e Herz International Seabird Fellowship debi cu entre otro e tin un Bachelor of Science den Agricultura tropic y specialisa den produccion animal. E fellowship tabata destina pa hendenan cu ta traha den conservacion di naturalesa, sea den gobierno of instancianan particular.

Na aña 2012 ing. Franken, ariba invitacion di e Society for the Conservation and Study of Caribbean birds, a atende e international workshop di Build Capacity for Seabird Conservation in the Wider Caribbean and the Gulf of Mexico na e Gerace Research Centra San Salvador, Bahamas.

Departamento di Agricultura, Cria y Pesca ta extende un invitacion na pueblo completo specialmente habitantenan di Colony y San Nicolas pa atende un charla diahuebs 29 di januari for di 6:30 pa 7:30 na Biblioteca Nacional San Nicolas y asina siña mas riba e parha importante aki. □